



**NUR Adila Md. Yusnizam (kanan) bersama rakan-rakan universiti menunjukkan bantuan yang diterima menerusi Program Sulung di UTHM, Batu Pahat.**

# Kerja kilang, hotel kumpul duit biayai pengajian universiti

Oleh **ADNAN IBRAHIM**  
 utusannews@mediamulia.com.my

**BATU PAHAT:** “Ayah saya penoreh getah, ibu pula suri rumah. Jadi, saya perlu bekerja, kumpul duit, sebab nak sambung pengajian ke universiti”.

Demikian jelas Nur Adila Md. Yusnizam, 19, penuntut baharu Universiti Putra Malaysia (UPM) ketika menceritakan mengenai usahanya mengumpul duit untuk menyambung pengajian dengan bekerja di sebuah kilang.

Menurutnya yang kini mengikuti program Ijazah Sarjana Muda Kejuruteraan Awam, pendapatan bapanya tidak mencukupi untuk menyediakan dana secukupnya bagi membiayai kos pengajian.

Dia yang berasal dari Kedah bersyukur dengan adanya

Program Pembangunan Siswa Sulung Keluarga Malaysia (Sulung) dapat membantu meringankan beban keluarganya menyediakan keperluan untuk memulakan pengajian di UPM.

“Bekerja kilang memberikan saya pengajaran tentang betapa sukarnya seorang ayah membanting tulang untuk mencari wang bagi membolehkan anak-anak berjaya dalam pelajaran.

“Pengajaran ini juga sebagai penguat tekad untuk belajar lebih gigih sebagai membalas kepercayaan kerajaan membantu saya dengan bantuan serba lengkap ini,” kata anak keempat daripada lima beradik tersebut ketika ditemui dalam majlis pelancaran program Sulung di Universiti Tun Hussein Onn Malaysia (UTHM) di sini semalam.

Sementara itu, penuntut ju-

rusan Kejuruteraan Kimia UPM, Muhammad Alif Aidil Suparwi, 20, dari Gelang Patah menyifatkan program Sulung amat besar ertinya bagi mereka yang tergolong dalam keluarga B40.

Sebelum berjaya menjejakan kaki ke menara gading, dia yang merupakan anak bongsu daripada 10 beradik bekerja secara sambilan di beberapa hotel di Johor Bahru.

“Ayah sudah berusia 67 tahun dan tidak boleh melakukan kerja berat, manakala ibu hanya membuat kuih serta berniaga kecil-kecilan di hadapan rumah,” katanya.

Dalam pada itu, seramai 76 penuntut daripada lapan universiti menjadi penerima pertama program Sulung yang disampaikan oleh Menteri Pengajian Tinggi, Datuk Seri Dr. Noraini Ahmad.